

蘭

軒

集



蘭軒集

四庫全書珍本初集

別集部  
集類

詳校官中書<sub>臣</sub>羅錦森

侍讀<sub>臣</sub>孫球覆勘

商務印書館  
部中央圖書館  
藏委託景作故宮  
博物院藏文淵閣本

膳錄舉人臣黃道暉

膳錄監生臣單可堯

欽定四庫全書

集部五

提要

蘭軒集十六卷

別集類四

元

臣等謹案蘭軒集十六卷元王旭撰旭字景初東平人其事蹟不見於元史談藝亦罕見稱述顧嗣立撰元詩選彙輯至三百家不載旭集則遺篇久佚可知惟山東通志稱旭與同郡王構及永年王磐俱以文章名世天下

號為三王而於其出處本末亦未詳載則併  
其人亦幾湮沒矣今以集中詩文考之蓋旭  
家貧力學教授四方嘗為礪山令所賓禮送  
王侯二生序所云至元庚寅礪宰崔公以禮  
招余至其邑俾專講席者是也又嘗至長蘆  
主高百川家中和書院記所云辱承君幣來  
自泰山者是也其餘如安陽如鄆城如鯨川  
皆所曾僑寓之地又嘗至杭州之長沙遊跡

幾半天下而卒未登仕版其有寄詩云處困  
不堪家累重謀生聊藉主人賢生平境遇即  
此可以見其大槩矣其詩隨意抒寫不屑屑  
于雕章琢句而氣體超邁亦復時見性靈古  
文多講學家言其井田說一篇務欲復三代  
制迂濶尤甚殆全不解事之腐儒然如記序  
諸作和平通達與之坐而談理其持論則未  
嘗不醇正未可廢也其集見于文淵閣書目

中者一部一冊而焦竑經籍志則作二十卷  
今從永樂大典採掇排比尚可得十六卷決  
非一冊所能盡或一冊一字為十字之訛歟  
乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

蘭軒集卷一

元王旭撰

賦

古劍賦

客有厲迹名場經營四方激風雲於詭譎變天地於低昂氣滿志得悲憐寒鄉者一旦謂主人曰吾有寶劍其名干將非砥非礪自鋒自鋌眩眩兮紫電稜稜兮秋霜挺三尺之精英抱百鍊之純鋼運之以機權錯之以文

章形之以利便脅之以禍殃鼓舞闐闐操縱抑揚惟利  
是從不拘其常或左或右萬夫莫當朝離乎泥塗夕宿  
乎巖廊入金門上玉堂虎豹兮紛拏蛟龍兮陸梁同驅  
兮並驚我全兮彼傷處女推鋒而却立猿公失據而惑  
惶此劒一試身名兩彰若此者得非主人之所願觀乎  
主人曰噫客知今之劒而未知古之劒也夫古之劒鑄  
之以元氣鍊之以陰陽鍛之以五行淬之以三光匣之  
以仁義佩之以忠良卷之不盈握舒之彌八荒赫赫明

明收功於文武巍巍蕩蕩無敵於陶唐五伯假之而為  
伯三王本之而為王正地維振天綱幹萬化懸中央氣  
塞乎宇宙形藏乎混茫淺滄海兮卑太行小崆峒兮近  
扶桑來無所從去無所往固浩然獨立於天地不與物  
而存亡此劍一試太平無疆若此者又非薛燭之所能  
辯張華之所能識而吾子之所能髣髴而論量也客於  
是喪其所有茫然而退

擬遠遊賦

并序

昔予南遊遇劉陵川於亳社之泮宮因誦舊著詩文  
數篇以求指教劉喜謂座客曰是子頗有氣象將來  
可望惜吾之老而力弱不能振也命酒因語及楚詞  
篇目且歎屈原之文詞而哀其忠因為僕曰子為我  
擬賦遠遊一篇來僕辭不敢劉曰吾姑試子宜無辭  
遂明日呈此蓋以述原之情有志而不遂亦九辯代  
原之意而亦以自寄云時至元三年冬十一月也

原註

先生諱芳字元  
卿時年七十矣

邈鴻荒忽已遠兮望前修而莫及仰六聖之玄風兮懷  
三皇之淳德後精魂於千載兮曰予希其彷彿忽翩然  
而下墜兮心滔滔而何極悲斯世之沈濁兮背馳余而  
莫偶既醉酒以昏酣兮又中風兮狂走諒紛華不可長  
兮獨冲澹以自守惟天地之漫漫兮浩變化之無窮哀  
吾生之促迫兮寄瞬息乎其中思遠遊以舒憤兮超逍  
遙以長終營營而無寐兮晝鬱鬱其不樂仰浮雲之縹  
緲兮願輕車而無託精神忽其流蕩兮離人羣而高逸

雲為車而風為馬兮召飛廉以執轡八龍婉婉以前導  
兮云濟予乎西北過玄武而至太微兮問瓊宮之所在  
排閭闔以徑度兮慶天皇之佳會叩玉階以對揚兮陳  
下土之迫隘激微忠而抗音兮願乾坤之交泰令雲雨  
以飛揚兮降膏澤之滂沛飽四海以玄精兮飲羣生以  
沆瀣吐微誠之未終兮驚羣公之譎恠令豐隆之奏技  
兮振天鼓之砰礚中鬱陶而莫遂兮還余車而言邁視  
人寰不足留兮余將觀乎方之外乘青陽以東遊兮遇

廣成於崆峒問道德之微言兮願開予之所蒙曰道不  
難授兮將其人之難得粗者不可傳兮尚安語其所極  
其大無方兮其小無內無屈其志兮無滯其氣順開闔  
於陰陽兮法化育於天地澹逍遙以無為兮使精神之  
得一可長生而超化兮斯道真之所貴受微言而拜謝  
兮聞神丘而遂沮涉清海之漫漫兮訪潛龍之幽居入  
珠宮與貝闕兮世莫知予之所為召海若兮邀處妃歌  
天吳兮舞馮夷吸翠霞之天矯服明月之流離雖極樂

而非余志兮告潛龍以俱行志參差以叛渙兮悵遐舉  
而獨征過弱水而超扶桑兮至神丘而一息從王喬與  
琴高兮娛青春以遊戲嘆榮華之不足恃兮恐六龍之  
蹉跎留余車於崑山兮飲余馬於雲河登閬風以回顧  
兮哀神州而曠蕩下茫茫而不見人兮蔽林壑之蒼莽  
悲故鄉之若斯兮吾歸來而何望情依依以遲遲兮心  
悠悠以漾漾思重華而南征兮正予冠而翱翔驂紫臺  
之青鸞兮馭丹穴之鳳凰清風過洞庭倒影凌瀟湘夕